

Transkript sa konferencije za medije međunarodnih organizacija

OHR, Oleg Milišić

OSCE, Aida Bešić

EUFOR, Jem Thomas

OHR

Zakon o Sistemu javnog emitiranja mora biti usklađen

Kao što vam je poznato, Parlament Federacije BiH mora u potpunosti uskladiti svoje zakone sa Zakonom o Sistemu javnog emitiranja koji je Parlament BiH usvojio 5. oktobra 2005. godine. Ovo je ključni preduvjet koji BiH mora ispuniti ako želi krenuti dalje u pregovorima o Sporazumu o stabilizaciji i pridruživanju.

U pojedinim medijima objavljene su informacije o predloženim izmjenama i dopunama Zakona o RTV Federacije BiH, i ukoliko Zastupnički dom Parlamenta Federacije BiH ove amandmane usvoji federalni zakon neće biti usklađen sa državnim zakonom. Ako bi bili usvojeni, ovi amandmani bi ugrozili cjelokupan proces.

Da bi ovaj sistem postao operativan, na entitetskom nivou moraju biti usvojeni zakoni koji će biti u potpunosti usklađeni sa državnim zakonom. Bez toga ne mogu biti ispunjeni uvjeti za pregovore o Sporazumu o stabilizaciji i pridruživanju.

Parlament Federacije BiH mora dobiti priliku da razmatra načela lokalne samouprave

Kao što vam je poznato, već dvije godine se na nivou Vlade i komisija odgovlači usvajanje izmjena i dopuna Ustava Federacije BiH koji se odnose na lokalnu samoupravu i Zakon o načelima lokalne samouprave, tako da Parlament nije ni imao priliku da podrži ovu inicijativu.

Međutim, načinjen je pozitivan korak, tako da su predložene izmjene i dopune Ustava Federacije BiH te Prijedlog zakona o načelima lokalne samouprave sada konačno ušli u parlamentarnu proceduru. Ured visokog predstavnika poziva predsjedavajuće oba doma Federalnog parlamenta da interes građana stave na prvo mjesto i ove prijedloge stave na raspravu na narednoj sjednici zakonodavnog tijela Federacije BiH.

Postojeći zakoni koji reguliraju ovu oblast u BiH nisu jasno i precizno utvrdili podjelu odgovornosti, odnosno koje će konkretno usluge građanima pružati koji nivo vlasti. Posljedica takve situacije je nedostatak odgovornosti i finansijskih sredstava, što znači da poreski obveznici ne dobijaju usluge za koje plaćaju.

Usvajanje Zakona o načelima lokalne samouprave na entitetskom nivou predstavlja još jedan korak ka ispunjenju međunarodne obaveze koju je BiH preuzela kada je ratificirala Evropsku povelju o lokalnoj samoupravi nakon što je postala članica Vijeća Evrope. Republika Srpska usvojila je Zakon o lokalnoj samoupravi u septembru 2004. godine.

Moram naglasiti da su Zakon o načelima lokalne samouprave i odgovarajuće izmjene i dopune Ustava izradili predstavnici BiH, u saradnji sa Vijećem Evrope.

OSCE

Ambasador Douglas Davidson sutra će posjetiti općinu Višegrad

Ambasador Douglas Davidson, šef Misije OSCE-a u Bosni i

Hercegovini, sutra, 1. marta 2006. godine, otići će u zvaničnu posjetu općini Višegrad.

Ambasador Davidson će se sastati sa Miladinom Miličevićem, načelnikom Općine Višegrad i Redžepom Jelačićem, predsjednikom Skupštine općine Višegrad. Ova prilika bit će iskorištena kako bi se razgovaralo o statusu programa Misije OSCE-a u oblasti ljudskih prava, demokratizacije, obrazovanja i javne uprave u općini Višegrad.

Ambasador Davidson posjetit će Osnovnu školu "Međeđa", gdje će se susresti sa Slavčom Sandevom, direktorom škole, kao i razgovarati s učiteljima i učenicima ove škole. Ambasador Davidson, također, će posjetiti Osnovni sud u Višgradu, gdje će se susresti sa predsjednicom suda, Radmilom Bogdanović, kako bi razgovarali o važnosti vladavine zakona i poštivanja odredbi u vezi sa ljudskim pravima i standardima na općinskom nivou.

EUFOR

Nije bilo izjava.